

四庫全書

子部

欽定四庫全書

御纂醫宗金鑑卷十

訂正仲景全書傷寒論註差後勞復食復陰陽易病
脈證併治篇目錄

枳實梔子豉湯

牡蠣澤瀉湯

竹葉石膏湯

燒裨散

御纂醫宗金鑑卷十目錄

欽定四庫全書

御纂醫宗金鑑卷十

訂正仲景全書傷寒論註

辨差後勞復食復陰陽易病脈證并治篇

傷寒新愈起居作勞因而復病謂之勞復強食穀食因而復病謂之食復男女交接復而自病謂之房勞復男女交接相易為病謂之陰陽易謂男傳不病之女女傳不病之男有如交易也蓋因其人

新差餘邪伏於藏府未經悉解故犯之輒復也學者於臨證時審其脈證而詳辨之則施治自無誤矣

大病差後勞復者枳實梔子豉湯主之若有宿食者加大黃如博碁子五六枚

註

大病差後謂傷寒病新差後也勞復者謂起居作勞復病非房勞復也宜枳實梔子豉湯主之溫覆令微似汗自愈不取其涌者以熱不在胸而在經

也若因過食復病者謂之食復以有宿食也宜積實梔子豉湯加大黃下之

集註成無已曰勞復則熱氣浮越與枳實梔子豉湯以

解之食復則胃有宿積加大黃以下之

王肯堂曰傷寒之邪自外入勞復之邪自內發

枳實梔子豉湯方

枳實 三枚

炙

梔子 十四枚

擘

豉 一升

綿裹

右三味以清漿水七升空煮取四升內枳實梔子
煮取二升下豉更煮五六沸去滓溫分再服覆令
微似汗

方解

是方也用清漿水七升空煮至四升者是欲水之
熟而趨下不欲上涌作吐也下豉煮五六沸即去
滓者取其清腐之氣走表易於取汗也太陽用之
以作吐勞復用之以作汗仲景用方之妙藥品雖
同煎法各異故施用不同也於此可類推矣

集解

方有執曰大邪初退血氣新虛起居作勞復生餘熱乃用苦寒以發其微汗者以勞傷之復熱與初病之實熱不同倫也方中用清漿水七升空煮至四升全是欲水之熟而趨下不至上涌作吐與太陽中篇下後身熱取吐之法不同所以覆令微似汗也

傷寒差已後更發熱小柴胡湯主之脈浮者以汗解之脈沉實者以下解之

註此承上條詳言證脈以別其治也傷寒差已後更復發熱者雖有勞復食復之別然須分或宜和或宜汗或宜下之不同如脈浮有表當以汗解者用枳實梔子豉湯汗之脈沉有裏者當以下解者用枳實梔子豉加大黃湯下之若無表裏證當和解之者用小柴胡湯和之對證施治斯爲合法

集註

方有執曰此示病後不謹調理致復之大法脈浮有所重感者也脈沉飲食失節也

魏荔彤曰大病後不宜大汗喻註謂用枳實梔
湯以微汗是也大病後不宜大下喻註謂枳實梔
豉湯加大黃以微下是也然亦有不能盡該者凡
於汗下之中留心其爲大病之後庶治復病而不
礙於大病後也

大病差後從腰以下有水氣者牡蠣澤瀉散主之

註

傷寒病差後從腰以下腫者是有水氣也宜牡蠣
澤瀉散逐水氣恐緩則水盛必上犯陽部也

集註

成無已曰大病差後脾胃氣虛不能制約腎水

溢下焦故腰以下爲腫也金匱要畧云腰以下腫

當利小便與牡蠣澤瀉散利小便而散水可也

牡蠣澤瀉散方

牡蠣熬

澤瀉

桔萋根

蜀漆煖水洗去腥

商陸根熬

海藻洗去鹹

苦苧蔎

各等分熬

右七味異搗下篩爲散更入白中治之白飲和服
方寸匕日三服小便利止後服

方解

水停於內外泛作腫腰以上者當汗之小青龍越
婢是也腰以下者當利小便此方是也以牡蠣破
水之堅澤瀉利水之蓄海藻散水之泛枯萋根消
水之腫又以蜀漆苦葶藶商陸根辛苦有毒之品
直搗其巢峻逐水氣使從大小二便而出然此方
施之於形氣實者其腫可隨愈也若病後土虛不

能制水腎虛不能行水則又當別論慎不可服也
大病差後喜唾久不了了胸上有寒當以丸藥溫之宜

理中丸

註

大病差後喜唾久不了了者胃中虛寒不能運化
津液聚而成唾故唾日久無已時也宜理中丸以
溫補其胃自可已也

集註

程知曰病後陽氣不足胃中虛寒不內津液故喜
唾不了了前牡蠣澤瀉用散者欲其戀肺而下水

也此理中用丸者欲其溫胃而收唾也

喻昌曰身中津液因胃寒凝結而成濁唾久而不清其人必消瘦索澤故不用湯藥蕩滌而用丸藥緩圖也

張璐曰傷寒差後體虛每有遺熱故禁溫補即間有素稟虛寒者祇宜理中丸調理未嘗輕用桂附也

傷寒解後虛羸少氣氣逆欲吐竹葉石膏湯主之

註 傷寒解後虛羸寒傷形也少氣熱傷氣也氣逆欲

吐餘邪挾飲犯胃也故宜竹葉石膏湯益虛清熱
以降逆氣也

集註 方有執曰病後虛羸少氣脾胃未強飲食難化則

痰飲易生飲停氣逆故欲吐也

程知曰傷寒解後津液不足則虛羸餘熱不盡則
傷氣與竹葉石膏湯以調胃而去虛熱蓋前條是
治病後虛寒此條是治病後虛熱也

竹葉石膏湯方

竹葉 二把

石膏 一觔

半夏 半升

人參 二兩

甘草 二兩

粳米 半升

麥冬 一升

去心

右七味以水一斗煮取六升去滓內粳米煮米熟
湯成去米溫服一升日三服

方解是方也即白虎湯去知母加人參麥冬半夏竹葉

也以大寒之劑易為清補之方此仲景曰虎變方也經曰形不足者溫之以氣精不足者補之以味故用人參粳米補形氣也佐竹葉石膏清胃熱也加麥冬生津半夏降逆更逐痰飲甘草補中且以調和諸藥也

病人脈已解而日暮微煩以病新差人強與穀脾胃氣尚弱不能消穀故令微煩損穀則愈

註病人脈已解謂病脈悉解也惟日西微煩者以病

新差強食穀蚤胃氣尚弱不能消穀故令微煩不
須藥也損穀自愈

集註方有執曰強與穀謂強其進食也損者言當節減
之也

喻昌曰註家牽引日暮為陽明之王時故以損穀
為當小下不知此論差後之證非論六經轉陽明
之證也日暮即內經日西而陽氣已衰之意所以
不能消穀也不可引前條宿食輕用大黃重傷脾

胃也

王鶴田曰此言差後強食而爲虛中之實證也病後起居坐卧俱宜聽其自然不可勉強強則非其所欲反逆其性而不安矣不特一食也

傷寒陰陽易之爲病其人身體重少氣少腹裏急或引陰中拘攣熱上衝胸頭重不欲舉眼中生花膝脛拘急者燒視散主之

註傷寒新愈之後男女不謹偶犯餘事發熱復病者

謂之房勞復男以六味地黃湯主之女以四物湯
主之隨證加減治之可也若犯餘事男病傳女女
病傳男相易爲病謂之陰陽易其證身重少氣少
腹急痛牽引陰中膝脛拘急或熱氣衝胸頭重不
欲舉眼中生花等證皆餘毒乘虛傳易也當以燒
裨散主之

集註

王肯堂曰房勞復病謂新差之後或尚未愈而男
婦相交接復病者若同陰陽易證則從陰陽易治

亦有寒熱多汗頭重目眩腹中拘急百節解離經
脈緩弱筋骨痿軟不能動移精髓空虛心神恍惚
遷延歲月方死者宜當歸四逆湯厥者加附子寒
者加吳茱萸生薑以治之

按

差後男女交合而病者若無陰陽易證而有表證則不
可從陰陽易治當從房事後犯風寒治汗吐下法皆不
可輕用即有應汗應吐之證汗則以補中益氣湯加麻
桂微汗之厥者加炮附子吐則以補中益氣湯加淡豆

致探吐之適可即止總當識此為新病之後也

方有執曰傷寒包中風而言也易猶交易變易之
易言大病新差血氣未復強合陰陽則二氣交感
互相換易而為病也身體重少氣真元虧竭而困
倦也少腹裏急或引陰中拘攣者所易之氣內攻
也熱上衝胸頭不欲舉眼中生花者虛陽生熱而
上蒸也膝脛拘急者脈亂而筋傷也衽襜近陰處
陰陽二氣之所聚也男女易用物各歸本也

喻昌曰病傷寒之人熱毒藏於氣血中者漸從表裏解散惟熱毒藏於骨髓之中者無絲發泄故差後與不病之體交接男病傳不病之女女病傳不病之男所以名爲陰陽易即交易之義也

燒裨散方

婦人中裨近隱處取燒作灰

右一味水服方寸匕日三服小便即利陰頭微腫此爲愈矣婦人病取男子裨燒服

解方

男女視襠濁敗之物也燒灰用者取其通散亦同
氣相求之義耳服後或汗出或小便利則愈陰頭
微腫者是所易之毒從陰竅而出故腫也

音切

垢

音苟

佛

音佛

鬱

音熨

攣

力全切

脛

胡定切

視

音昆
同禪

御纂醫宗金鑑卷十

欽定四庫全書

御纂醫宗金鑑卷十一

訂正仲景全書傷寒論註壞病篇目錄

陽旦湯補

甘草乾薑湯

芍藥甘草湯

麻黃升麻湯

柴胡加龍骨牡蠣湯

禹餘糧丸 缺

桂枝加桂湯更加桂

桂枝去芍藥加蜀漆龍骨牡蠣救逆湯

桂枝甘草龍骨牡蠣湯

御纂醫宗金鑑卷十一目錄

欽定四庫全書

御纂醫宗金鑑卷十一

訂正仲景全書傷寒論註

辨壞病衄證并治篇

壞病者謂不當汗而汗不當吐而吐不當下而下
即當汗吐下而過甚或當汗吐下而失時皆為施
治失宜所以成壞病也凡三陰三陽若汗若吐若
下若溫鍼火熏火熨火灸火劫等法致諸壞病者

有汗後亡陽眩冒振惕魄汗不收有下後虛中結
胸痞鞭下利不止有吐後煩亂腹滿有溫鍼失血
驚狂甚至陽毒斑狂陰躁欲死神昏讖語循衣摸
床之類是也其論散見諸篇今合為一集以便後
學其中或有掛漏是在能三反者

太陽病三日已發汗若吐若下若溫鍼仍不解者此為
壞病桂枝不中與也觀其脈證知犯何逆隨證治之

註
太陽病三日邪在三陽時也若已經發汗若吐若

下若溫鍼其法備施病仍不解者此為壞病由施
治失宜也此時即有表證桂枝亦不中與當觀其
脈證知所誤犯者何逆而隨證治之不可以成法
拘也

集註方有執曰既不可定以正名則亦難以出其正治
故但示人以隨機應變之微旨一以貫之斯言盡
之矣

程知曰病在太陽治之不當即成壞病故初治不

可不慎桂枝不可與以桂枝證罷也若桂枝證仍在則不謂之壞病矣

程應旄曰如汗後亡陽動經渴躁讖語下後虛煩結胸痞氣吐後內煩腹脹滿溫鍼後吐衄驚狂之類紛紜錯出者俱是爲前治所壞後人切不可執成法以救逆所以前證雖屬桂枝若壞則桂枝亦不中與也觀其脈證知犯何逆隨證治之蓋欲反逆爲順也非從望聞問切上探出前後根因無從

隨證用法非頭痛醫頭之爲隨證治之也

吳人駒曰不得拘三日爲表病而與桂枝當依現在之變壞者而爲救治

本太陽病不解轉入少陽者脇下鞕滿乾嘔不能食往來寒熱尚未吐下脈沉緊者與小柴胡湯若已吐下發汗溫鍼讖語柴胡湯證罷此爲壞病知犯何逆以法治之

按脈沉緊當是脈沉弦若是沉緊是寒實在胸當吐

之證也惟脈沉弦始與上文之義相屬故可與小柴胡湯

註本太陽病不解而見脇下鞭滿乾嘔不能食往來寒熱等證脈沉弦是邪轉入少陽也若未經吐下者當與小柴胡湯解其半表半裏之邪可也其已經吐下發汗溫鍼者則表裏俱虛更加讖語柴胡證罷此爲壞病即小柴胡湯亦不中與也當審其所犯何逆隨證以法治之可也

集註

成無已曰轉入少陽柴胡證也若已吐下發汗溫
鍼不惟犯少陽三禁更加溫鍼以迫劫之損耗津
液胃中乾燥必發譫語柴胡證罷者謂無脇下鞭
滿乾嘔不能食往來寒熱等證也此爲壞病

沈明宗曰太陽不解而傳少陽當與小柴胡和解
乃爲定法反以吐下發汗溫鍼以犯少陽之戒而
邪熱陷入陽明故發譫語已爲壞證要知譫語乃
陽明受病即當知犯陽明之逆而治之若無譫語

而見他經壞證須憑證憑脈另以活法治之也

太陽病中風以火劫發汗邪風被火熱血氣流溢失其常度兩陽相熏灼其身發黃陽盛則欲衄陰虛則小便難陰陽俱虛竭身體則枯燥但頭汗出劑頸而還腹滿微喘口乾咽爛或不大便久則譫語甚者至噦手足躁擾捻衣摸床小便利者其人可治

註太陽病中風不以桂枝湯汗之而以火劫發汗故致生諸逆也風屬陽邪被火益熱故血氣流溢失

其常度也以風火俱陽故曰兩陽熏灼熱蒸血瘀
達於肌表故其身發黃也血爲熱迫故上逆欲衄
陰虛液竭故小便難陰陽虛竭故身體枯燥陽熱
熏灼陰液上越故頭汗出劑頸而還也熱傳太陰
故腹滿口燥熱傳少陰故口乾咽爛熱壅於胸故
肺燥微喘熱結於胃故不大便愈久則熱益深故
噦逆讖語神明昏亂手足躁擾捻衣摸床之證見
矣凡此諸壞證推求其源皆由邪火逆亂真陰立

亡多不可治然或小便利者則陰氣尚在故猶爲可治也可不慎之於始哉

集註

成無已曰內經云諸脹腹大皆屬於熱腹滿微喘者熱氣內鬱也經云火氣內發上爲口乾咽爛者火熱上熏也熱氣上而不下則大便不鞭若熱氣下入胃中消耗津液則大便鞭故云或不大便久則胃中燥熱必發譫語經云病深者其聲噦火氣太甚正氣逆亂故噦經云四肢者諸陽之本也陽

盛則動故手足躁擾捻衣摸床也小便利者是陰未竭猶可治也

喻昌曰此證陽邪挾火擾亂陰分而亡其陰與前二條亡陽證天淵懸絕觀陽盛欲衄身體枯燥諸句則知此證宜急驅其陽以存一線之陰不得泥陰陽俱虛竭一語而補其陽劫其陰也且頭汗為陽邪上壅不下通於陰所以劑頸以下不能得汗設見衄血則邪從衄解頭間且無汗矣設有汗則

邪從汗解又不衄矣後條火邪深入必圉血亦身體枯燥而不得汗設有汗便不圉血矣讀古人書全要會意豈有得汗仍衄血圉血之理哉又曰仲景以小便利一端辨真陰之亡與未亡最細蓋水出高原小便利則津液不枯肺氣不絕可知也腎以膀胱爲府小便利則膀胱之氣化行腎水未絕可知也

程應旄曰已上諸證莫非邪火逆亂真陰立亡之

象推求其原一皆血氣流溢失其常度至於如此
邪風被火熱之害可勝言哉此際欲治風而火勢
沸騰欲治火而風邪壅遏何從治之惟利小便一
法如豬苓湯類可以導熱滋乾使小便得利則太
陽之邪亦從膀胱為去路尚可治也倘利之而不
利火無從出危矣

太陽病醫發汗遂發熱惡寒因復下之心下痞表裏俱
虛陰陽氣並竭無陽則陰獨復加燒鍼因胸煩面色青

黃膚潤者難治今色微黃手足溫者易愈

註

太陽表病醫過發汗已虛其表因復下之又虛其裏雖有未盡之表邪陷裏成痞但表裏俱虛陰陽並竭已成壞證矣况無陽則陰不生陰獨則陽不化而復加燒鍼火氣內攻陰陽皆病故胸滿而煩面色青黃肌膚潤動也見證如此錯雜故為難治若面色微黃不青手足不厥而溫則為陰陽之氣未竭故曰易治也

集註

方有執曰表以誤汗言裏以誤下言故曰俱虛陰
指裏陽指表無陽謂陽竭也陰獨謂痞也青黃脾
受尅賊之色微黃土見回生之色手足溫陽氣回
於四末也言既經反覆之誤又見尅賊之色肌膚
潤動而不寧則脾家之真陰敗爲難治也今則土
見回生之色四末得溫胃家之陽復故爲易愈也
傷寒脈浮自汗出小便數心煩微惡寒脚攣急反與桂
枝湯欲攻其表此誤也得之便厥咽中乾煩燥吐逆者

作甘草乾薑湯與之以復其陽若厥愈足溫者更作芍藥甘草湯與之其脚即伸若胃氣不和譏語者少與調胃承氣湯若重發汗復加燒鍼者四逆湯主之

註傷寒脈浮自汗出中風證也小便數心煩裏無熱

之虛煩也微惡寒者表陽虛不能禦也脚攣急者表寒收引拘急也是當與桂枝增桂加附子湯以溫經止汗今反與桂枝湯攻發其表此大誤也服後便厥者陽因汗亡也咽乾者陰因汗竭也煩燥

者陽失藏也吐逆者陰拒格也故作甘草乾薑湯
與之以緩其陰而復其陽若厥愈足溫則是陽已
復宜更作芍藥甘草湯與之以調其陰而和其陽
則脚即伸也若胃不和而譏語知爲邪已轉屬陽
明當少少與調胃承氣湯令其微溏胃和自可愈
也若重發汗者謂不止誤服桂枝湯而更誤服麻
黃湯也或復加燒鍼劫取其汗以致亡陽證具則
又非甘草乾薑湯所能治故又當與四逆湯以急

救其陽也

集註程應旄曰脈浮自汗雖似桂枝證而頭項不痛知

陽神自歉於上部惡寒脚攣急知陰邪更襲於下
焦陽虛陰盛而裏氣上逆故有心煩證裏陰攻及
表陽差訛祇在煩字上觀結句若重發汗復加燒
鍼者四逆湯主之可見陰證不必真直中也治之
一誤寒即中於治法中矣

問曰證象陽且按法治之而增劇厥逆咽中乾兩脰拘

急而讖語師言夜半手足當溫兩脚當伸後如師言何以知此答曰寸口脈浮而大浮為風大為虛風則生微熱虛則兩脛攣病形象桂枝因加附子參其間增桂令汗出附子溫經七陽故也厥逆咽中乾煩躁陽明內結讖語煩亂更飲甘草乾薑湯夜半陽氣還兩足當熱脛尚微拘急重與芍藥甘草湯爾乃脛伸以承氣湯微澹則止其讖語故知病可愈

註此設問答申明上條之義也桂枝證當用桂枝值

時令溫熱或其人有熱用陽旦湯即桂枝湯加黃
芩也值時令寒冷或其人有寒用陰旦湯即桂枝
湯加乾薑也證象陽旦謂心煩似乎有熱也按法
治之謂按法用陽旦湯也蓋心煩小便數咽中乾
似乎陽旦而不審脚攣急微惡寒之證是陰寒也
即以陽旦湯攻其表誤也所以增劇厥逆咽中乾
兩脛拘急讖語等壞證作也師言夜半手足當溫
兩脚當伸如其言者何也答曰診脈浮大則為風

虛非寒虛也故此知用桂枝不足以治其寒而加
附子溫經即有陽明內結譫語煩亂等證渾不為
意且更與甘草乾薑湯至夜半陽回足熱脛尚微
拘急即與芍藥甘草湯以和其陰爾乃脛伸繼以
承氣治其陽明內結故微溲而譫語止其病可愈
矣是皆由於救之得法耳

陽旦湯方補

桂枝 三錢

芍藥 二錢
酒焙

甘草

炙 二錢

黃芩

酒炒 三錢

生薑

三片

大棗

擘 二枚

右水煎去滓溫服無時日二三服本方加乾薑名

陰旦湯

甘草乾薑湯方

甘草

炙 四兩

乾薑

炮 二兩

右二味以水三升煮取一升五合去滓分溫再服

芍藥甘草湯方

芍藥四兩

甘草四兩
炙

右二味以水三升煮取一升五合去滓分溫再服
傷寒吐下後發汗虛煩脈甚微八九日心下痞鞭脇下
痛氣上衝咽喉眩冒經脈動惕者久而成痿

按

八九日心下痞鞭脇下痛氣上衝咽喉三句與上
下文義不屬必是錯簡註家因此三句皆蔓衍支
離牽強註釋不知此證總因汗出過多大傷津液
而成當用補氣補血益筋壯骨之藥經年始可愈

也

註傷寒吐下後復發其汗治失其宜矣故令陽氣陰液兩虛也陰液虛故虛煩陽氣虛故脈微陽氣微而不升故目眩冒陰液虛而不濡故經脈動惕也陽氣陰液虧損久則百體失所滋養故力乏筋軟而成痿矣

傷寒六七日大下後寸脈沉而遲手足厥逆下部脈不至咽喉不利唾膿血泄利不止者爲難治麻黃升麻湯

主之

註傷寒六七日邪傳厥陰厥熱勝復之時醫不詳審陰陽而大下之致變中寒下竭之壞證中寒故寸脈沉遲手足厥逆下竭故尺脈不至泄利不止也蓋未下之前陽經尚伏表熱大下之後則其熱乘虛下陷內犯厥陰厥陰經循喉嚨貫膈注肺故咽喉不利唾膿血也此爲陰陽錯雜表裏混淆之證若溫其下恐助上熱欲清其上愈益中寒仲景故

以此湯主之正示人以陰陽錯雜爲難治當於表裏上下求治法也蓋下寒上熱固爲難溫溫裏寒無汗還宜解表故用麻黃升麻湯以解表和裏清上溫下隨證治之也

集註程知曰言厥逆有因於誤下致變者也凡傷寒熱

熾者其陰必虛六七日雖當傳裏之時設表證仍在而大下之則陰傷而陽亦陷寸脈沉遲手足厥冷下利不止傷其陽而氣內陷也下部脈不至咽

喉不利吐膿血傷其陰而熱內逼也一下之誤既傷其陽復傷其陰故難治與麻黃升麻湯以升陽調下清熱滋陰蓋傳經熱邪從外入於內者仍當從內出於外也故曰汗出愈

喻昌曰寸脈沉而遲明是陽去入陰之故非陽氣衰微可擬故雖手足厥冷下部脈不至泄利不止其不得為純陰無陽可知况咽喉不利唾膿血又陽邪搏陰上逆之徵驗所以仲景特於陰中提出

其陽得汗出而錯雜之邪盡解矣

麻黃升麻湯方

麻黃

二兩半
去節

升麻

一兩一分

當歸

一兩一分

知母

十八銖

黃芩

十八銖

萎蕤

十八銖

石膏

六銖
碎綿裹

白朮

六銖

乾薑

六銖

芍藥

六銖

天冬

六銖
去心

桂枝

六銖

茯苓六銖

甘草六銖
炙

右十四味以水一斗先煮麻黃一二沸去上沫內諸藥煮取三升去滓分溫三服相去如炊三升米頃令盡汗出愈

方解

下寒上熱若無表證當以黃連湯為法今有表證故復立此方以示隨證消息之治也升麻萎蕤黃芩石膏知母天冬乃升舉走上清熱之品用以避下寒且以滋上也麻黃桂枝乾薑當歸白芍白朮

茯苓甘草乃辛甘走外溫散之品用以遠上熱且以和內也分溫三服令盡汗出愈其意在緩而正不傷微邪而盡除也脈雖寸脈沉遲尺脈不至證雖手足厥逆下利不止究之原非純陰寒邪故兼咽喉痛唾膿血之證是寒熱混淆陰陽錯雜之病皆因大下奪中所變故仲景用此湯以去邪為主邪去而正自安也

傷寒八九日下之胸滿煩驚小便不利讖語一身盡重

不可轉側者柴胡加龍骨牡蠣湯主之

註傷寒八九日邪不解表不盡不可下也若下之其邪乘虛內陷在上者輕則胸滿重則結胸胸滿者熱入於胸氣壅塞也在中者輕則煩驚重則昏狂煩驚譫語者熱乘於心神不寧也在下者輕則小便不利重則少腹滿痛小便不利者熱客下焦水道阻也邪壅三焦則榮衛不行水無去路則外滲肌體故一身盡重不可轉側也以柴胡加龍骨牡

蠲湯主之其大意在和解鎮固攻補兼施也

按

此條乃陽經濕熱之身重若以爲津亡血滯陽氣不能宣布陰經濕寒之身重則誤矣寒濕身重用真武湯桂枝附子湯以不渴裏無熱也熱濕身重用白虎湯柴胡加龍骨牡蠣湯以譫煩胃有熱也其風濕風溫身重亦不外乎兼寒兼熱故此湯中用苓半大黃為佐也

集註方有執曰胸滿者下後裏虛外熱入裏挾飲上搏

於膈所以煩也驚傷心心藏神而居膈正虛邪勝所以不寧一身盡重不可轉側者傷寒本一身疼痛七津液而血滯不利故變為沉滯而重甚也

程知曰下而心煩腹滿治以梔樸為邪入腹也下而胸滿煩驚治以龍牡為邪入心也因火劫而致煩驚治以桂枝龍牡挽心陽之外越也因下而致煩驚治以柴胡龍骨牡蠣解心陽之內塞也大小陷胸以高下緩急別之諸瀉心湯以寒熱虛實辨

之半苓治痰苓連降逆扼歧湧虛煩參附回陽虛
下後大法備於斯矣

喻昌曰八九日過經乃下之可謂慎矣孰知外邪
未盡乘虛而陷邪方在表裏其患已及於神明於
此而補天浴日豈復易易

張璐曰此係少陽之裏證諸家註作心經病誤也
蓋少陽有三禁不可妄犯雖八九日過經下之尚
且邪氣內犯胃土受傷膽木失榮痰聚膈上有如

是之變故主以小柴胡和解內外逐飲通津加龍骨牡蠣以鎮肝膽之驚也

柴胡加龍骨牡蠣湯方

柴胡 四兩

半夏 二合
洗

龍骨 一兩半

人參 一兩半

大黃 二兩

牡蠣 一兩半

茯苓 一兩半

鉛丹 一兩半

桂枝 一兩半

生薑 一兩半

大棗

二枚
擘

右十一味以水八升煮取四升內大黃切如碁子

更煮一二沸去滓溫服一升

方解是證也為陰陽錯雜之邪是方也亦攻補錯雜之

藥柴桂解未盡之表邪大黃攻已陷之裏熱人參
薑棗補虛而和胃茯苓半夏利水而降逆龍骨牡
蠣鉛丹之澁重鎮驚收心而安神明斯為以錯雜
之藥而治錯雜之病也

汗家重發汗必恍惚心亂小便已陰痛與禹餘糧丸

按禹餘糧丸爲瀉痢之藥與此證不合與禹餘糧丸

五字衍文也

註

汗家謂平素好出汗之人也重發汗謂大發汗也
心主血汗乃心之液重發其汗血液大傷心失所
恃故神情恍惚心志不寧也液竭於下宗筋失養
故小便已陰莖疼也

集方有執曰心主血而藏神汗多則血虛而舍空恍

惚心亂者以舍空神紛散也陰宗筋也痛者液竭而失其所榮養也

程應旄曰心主血汗者心之液平素多汗之家心虛血少可知重發其汗遂至心失所養神恍惚而多忡憧之象此之謂亂小腸與心爲表裏心液虛而小腸之水亦竭故小便已而陰疼也

衄家不可發汗汗出必額上陷脈緊急目直視不能眴
不得眠

註
衄家者該吐血而言也謂凡衄血吐血之人陰氣
暴亡若再發其汗汗出液竭諸脈失養則額角上
陷中之脈為熱所灼故緊且急也目直視目瞪不
轉睛也不能眴目眦不合也亦皆由熱灼其脈引
縮使然不得眠者陽氣不能行於陰也凡此所見
之病皆陽盛陰微之危證誰謂衄家可輕發其汗
耶

集
註
喻昌曰目得血而能視汗為血液衄血之人清陽

之氣素傷更發其汗則額上必陷乃上焦枯竭之
應也諸脈皆屬於目筋脈緊急則目上瞪而不能
合目不合則不得眠也傷寒發煩目瞑者必衄宜
麻黃湯發其汗此言素常失血之人戒發其汗以
重虛其虛故也

亡血家不可發汗發汗則寒慄而振

註

凡失血之後血氣未復為亡血虛家皆不可發汗
也蓋失血之初固屬陽熱然亡血之後熱隨血去

熱固消矣而氣隨血亡陽亦危矣若再發汗則陽氣衰微力不能支故身寒噤慄振振聳動所必然也蓋發陰虛之汗汗出則亡陰即發暴吐衄血之汗也故見不能眴不得眠亡陰等病也發陽虛之汗汗出則亡陽即發亡血虛家之汗也故見寒慄而振亡陽等病也

集註方有執曰亡血陰已虛矣發汗復亡其陽故寒慄而振也

程應旄曰亡血陰虛陽已失依若發其汗陽從外脫故寒慄而振是為陰陽兩竭凡遇當汗證便當顧慮陰經之榮血有如此者

魏荔彤曰與其汗出亡陽方救陽何如汗未出先救陰以維陽不令汗出亡陽之為愈也

咽喉乾燥者不可發汗

註

咽喉乾燥津液不足也更發其汗則津液益枯故戒人雖有可汗之證亦不可發汗也

集註

方有執曰咽喉乾燥津液素虧本於腎水不足蓋少陰之脈循喉嚨也發汗則津液愈亡

程應旄曰凡遇可汗之證必當顧慮上焦之津液又有如此者

張璐曰此條與咽中閉塞似同實異此戒發汗以奪陽明之津彼戒發汗以奪少陰之血也

淋家不可發汗發汗則便血

註淋家者濕熱蓄於膀胱水道澀痛之病也若發其

汗濕隨汗去熱必獨流水府告匱迫其本經之血
從小便而出矣

集註程知曰膀胱裏熱則淋更發其汗則膀胱愈燥而

小便血矣

瘡家雖身疼痛不可發汗發汗則瘕

註瘡家初起毒熱未成法當汗散已經潰後血氣被

傷雖有身痛應汗表證亦不可發汗恐汗出榮衛
愈虛外風乘襲即不受外風筋失液養亦必致項

強反張而成痙病也

集註

喻昌曰身疼痛為寒傷榮之證本當發汗瘡瘍之人肌表素虛榮血暗耗更發其汗則外風襲虛內血不榮必致頸項強身反張而成痙痙亦膀胱之病也

太陽傷寒者加溫鍼必驚也燒鍼令其汗鍼處被寒核起而赤者必發奔豚氣從少腹上衝心者先灸核上一壯與桂枝加桂湯更加桂

註
太陽傷寒加溫鍼必驚者謂病傷寒之人卒然加
以溫鍼其心畏而必驚也非溫鍼之後必生驚病
也燒鍼即溫鍼也燒鍼取汗亦是汗法但鍼處宜
當避寒若不謹慎外被寒襲火鬱脈中血不流行
必結腫核赤起矣且溫鍼之火發為赤核又被寒
侵故不但不解反召陰邪蓋加鍼之時心既被驚
所以腎陰乘心之虛上凌心陽而發奔脈也奔脈
者腎陰邪也其狀氣從少腹上衝於心也先灸核

上各一壯者外去寒邪繼與桂枝加桂湯更加桂者內伐腎邪也

桂枝加桂湯方

於桂枝湯方內更加桂二兩成五兩餘依桂枝湯法

集解

徐彬曰此乃太陽風邪因燒鍼令汗復感於寒邪

從太陽之府膀胱襲入相合之腎藏而作奔豚故仍從太陽之例用桂枝全方倍加桂者以內瀉陰氣兼驅外邪也

太陽病以火熏之不得汗其人必躁到經不解必圍血
名為火邪

註火熏古劫汗法也即今火炕溫覆取汗之法太陽
病以火熏之不得汗其人必內熱躁甚陰液愈傷
陽不得陰無從化汗故反致不解也其火襲入陰
中傷其陰絡迫血下行故必圍血也命名火邪示
人以當治火邪不必治圍血也

集註方有執曰躁手足疾動也到猶言反也謂徒躁擾

而反不得解也汗為血之液血得熱則行火性大熱既不得汗則血必橫溢所以必圍血也

程應旄曰太陽病以火熏之取汗竟不得汗其液之素少可知蓋陽不得陰則無從化汗也陰虛被火熱無從出故其人躁擾不寧也

脈浮熱甚反灸之此為實實以虛治因火而動故咽燥而吐血

註 脈浮熱甚實熱在表也無灸之之理而反灸之此

為實實謂其誤以實為虛也故熱因火動其勢炎
炎致咽燥而吐血必矣蓋上條火傷陰分迫血下
行故令圉血此條火傷陽分迫血上行故吐血也

集註

程應旂曰表實有熱誤認虛寒而用灸法熱無從

泄因火而動自然內攻邪束於外火攻於內肺金
被傷故咽燥而吐血

汪琥曰表有風熱而反灸是以實作虛治也

微數之脈甚不可灸因火為邪則為煩逆追虛逐實血

散脈中火氣雖微內攻有力焦骨傷筋血難復也

註 微數之脈乃陰虛血少之證斷不可灸若誤灸之

艾火內攻為煩為逆煩者陰為陽擾也逆者追虛
逐實也陰本虛而加以火則愈虛是為追虛陽本
實而加以火則愈實是為逐實然血已耗散脈中
艾火之氣雖微而內攻有力矣故致焦骨傷筋血
難復也

集註 喻昌曰脈微而數陰虛多熱之徵也此而灸之則

虛者愈虛熱者愈熱不致傷殘不止矣

程應旄曰若血少陰虛之人脈見微數尤不可灸
以血主濡之主潤筋骨也若失其所濡則火之所
至其骨必焦其筋必損內傷其陰未有不流散於
經脈者也

榮氣微者加燒鍼則血留不行更發熱而躁煩也

註榮氣微者榮血虛微也榮血既已虛微若誤加燒

鍼則榮血涸留而無所行也豈止焦骨傷筋而已

哉所以更發熱而躁煩也

集註

程知曰言榮微忌燒鍼也陰虛則內熱若加燒鍼

以助陽則兩熱相合而榮血不行必更外發熱而內煩躁也

唐不巖曰其始也雖微流燒鍼以逼之也其既也留而不行燒鍼以竭之也

張璐曰火為陽邪必傷陰血治此者當以救陰為主

脈浮宜以汗解用火灸之邪無從出因火而盛病從腰以下必重而痺名火逆也

註

脈浮表邪宜以汗解誤用火灸傷其血液不能作汗反令表邪無所從出以致邪因火盛外不焦骨傷筋內不吐衄圜血而病腰以下重痺者必其人素有濕邪在下故從濕化也重者着也重着不移也然不以痺名者以非風寒濕之痺乃因火逆不相交通故名火逆也

集註

方有執曰痺濕病也因火逆治火邪夾陽邪而上
逆陽不下通陰不用事化不行而水不得泄故濕
著下體而重痺也

程應旄曰脈浮在表汗解為宜矣因火灸之不能
得汗則邪無出路因火而盛即不焦骨傷筋而火
阻其邪陰氣漸竭下焦乃榮血所治榮氣竭而不
運必重着而為痺名曰火逆示人欲治其痺宜先
治其火也

形作傷寒其脈不弦緊而弱弱者必渴被火者必讞語
弱者發熱脈浮解之當汗出愈

按 三弱字當俱是數字若是弱字孰從何有不但文
義不屬且論中並無此說

註

形作傷寒者言其病形作傷寒之狀也但其脈不
弦緊而數數者熱也脈浮數熱在表太陽證也沉
數熱在裏陽明證也數脈為熱熱入陽明故必口
渴若被火劫其熱更甚故必讞語脈數之病雖昏

發熱然其施治不無別焉若脈浮數發熱解之當
以汗汗出可愈宜大青龍湯脈沉數發熱解之當
以下下之可愈宜調胃承氣湯若脈數無表裏證
惟發熱而渴譫語者不可汗下宜白虎湯黃連解
毒湯清之可也

傷寒脈浮醫以火逼劫之亡陽必驚狂起臥不安者桂
枝去芍藥加蜀漆龍骨牡蠣救逆湯主之

註
傷寒脈浮醫不用麻桂之藥而以火劫取汗汗過

七陽故見驚狂起臥不安之證蓋由火劫之誤熱
氣從心且大脫津液神明失倚也然不用附子四
逆輩者以其爲火劫七陽也宜以桂枝湯去芍藥
加蜀漆龍骨牡蠣救逆湯主之去芍藥者恐其陰
性遲滯兼制桂枝不能迅走其外反失救急之旨
况既加龍蠣之固脫亦不須芍藥之酸收也蜀漆
氣寒味苦寒能勝熱苦能降逆火邪錯逆在所必
需也

集註

喻昌曰篇中誤服大青龍湯厥逆筋惕肉瞤而亡陽者乃汗多所致故用真武湯救之此以火迫劫而七陽者乃方寸元陽之神被火迫劫而飛騰散亂故驚狂起臥不安有如此者少緩須臾神丹莫挽矣故以此湯救之蓋陽神散亂當求之於陽桂枝湯陽藥也然必去芍藥之陰欽始得疾趨以達於陽位更加蜀漆者緣蜀漆之性最急又加龍骨牡蠣有形之骨屬為之舟楫以載神而返其宅也

桂枝去芍藥加蜀漆龍骨牡蠣救逆湯方

桂枝 三兩

甘草 二兩

生薑 三兩

牡蠣 五兩

龍骨 四兩

大棗 十二枚

蜀漆 三兩
洗去脚

右爲末以水一斗二升先煮蜀漆減二升內諸藥

煮取三升去滓溫服

火逆下之因燒鍼煩躁者桂枝甘草龍骨牡蠣湯主之

註

火逆者謂凡火劫取汗致逆者也此火逆因火鍼也燒鍼劫汗而復下之火逆之邪雖因下減而煩躁一證獨不除者蓋因汗下大傷津液而然也故用桂枝甘草以救表龍骨牡蠣以固中不治煩躁而煩躁自愈也

集註

喻昌曰此證誤而又誤雖無驚狂等變然煩躁則外邪未盡之候亦真陽欲亡之機也

程應旄曰火逆下之裏氣虛矣不治其虛更加燒

鍼自致亡陽但見煩躁證而不盡如前條之驚狂起臥不安者由熱勢之緩急有殊故前方之加減稍異總不容煩躁之以假亂真也

桂枝甘草龍骨牡蠣湯方

桂枝 一兩

甘草 二兩
炙

龍骨 二兩

牡蠣 二兩
熬

右四味為末以水五升煮取二升半去滓溫服八

合日三服

集解汪琥曰此方即桂枝去芍藥加蜀漆龍骨牡蠣救

逆湯制小其劑而用之也火邪迫內則生煩躁雖
煩躁似帶表邪不宜散以桂枝之辛熱而火逆既
經下之則陰血受傷較之救逆湯似當增芍藥也

音切

灼

音酌

摸

末各切

痿

烏魁切

唾

湯臥切

炊

音吹


劫

音訐

眴

與旬

同



御纂醫宗金鑑卷十一

欽定四庫全書

子部

御纂醫宗金鑑卷十二至
十四

詳校官太醫院醫士臣程泰

編修臣倉聖脈覆勘

總校官中書臣朱鈐

校對官中書臣毛鳳儀

謄錄舉人臣朱錫彤

欽定四庫全書

御纂醫宗金鑑卷十二

訂正仲景全書傷寒論註溫病篇

方無

御纂醫宗金鑑卷十二目錄

欽定四庫全書

御纂醫宗金鑑卷十二

訂正仲景全書傷寒論註

辨溫病脈證并治篇

內經言熱病皆傷寒之類也非謂類乎傷寒乃謂與傷寒同乎一類之病也蓋傷寒因傷時令之寒而得名也溫病熱病亦隨時而易其名耳經曰冬傷於寒則為病熱此即時而病者也經曰冬傷於

寒春必病溫此過時而病者也經曰凡病傷寒而成溫者先夏至為病溫後夏至為病暑暑即熱之謂也此隨時而病者也是則秋分已前皆得以熱病名之秋分已後皆得以傷寒名之矣此軒岐仲景立傷寒溫病熱病之名義也經又云藏於精者春不病溫此明過時不病之原也經曰冬不藏精春必病溫此明過時必病之故也於此可知傷寒為病不在精之藏與不藏而但有觸犯即得為病

非若溫病熱病藏精則不病不藏精則必病也但能藏精者縱偶感於邪或溫或暑其病自輕不藏精者雖微感其邪或溫或暑其病必重差為稍異耳若專以冬不藏精毫無外感為少陰本病熱從内生則悖仲景溫病之旨矣仲景論中但言太陽初病發熱而渴不惡寒者為溫病辨其非傷寒非謂太陽之寒不由表入竟從少陰之熱内生為病也經又曰風溫為病脈陰陽俱浮是明指溫病之

發因感春風輒動內熱而始發所以陰陽脈俱浮也蓋以溫病風溫與熱病論互發其義但熱病一論經已昭然若復立論未免贅疣非仲景詳於傷寒而畧於溫證也今將伏氣溫病風溫合為一篇其溫熱治法同於六經讀者再細玩素問熱病論及刺熱評熱諸論與是論互相參考自有得焉

師曰伏氣之病以意候之今月之內欲有伏氣假令舊有伏氣當須脈之若脈微弱者當喉中痛似傷非喉痺

也病人云實咽中痛雖爾今復欲下利

註 四時令氣正氣也非時之氣邪氣也正氣之中人
也淺感之甚者即病微者藏在肌膚不即為病壯
實之人可以自己邪氣之中人也深感之雖微亦
即為病甚則直入於藏不能自己虛者死焉此篇
所謂伏氣之病即四時令氣正病非四時不正之
邪與非常異氣之疫邪也所為伏氣者如感冬令
之風寒其重者傷於榮衛即時而發者名為中風

傷寒是也其感之輕者伏藏於肌膚過時而發名為溫病是也故時氣伏氣之為病二者不可不辨焉春三月名曰發陳是伏氣欲發之月也假令舊有伏氣之人乘冬不藏精之隙而病者當須以脈識之今月之內初病傷寒溫病者脈若微弱是少陰脈也若喉中痛是少陰證也然其痛必緩非若外感時氣之喉痺腫傷暴痛也今既云實咽中痛而脈又微弱故知為少陰伏氣內發之陰火也雖

爾咽痛恐復欲下利不可以時氣外感陽火之喉痺治之也

集註張錫駒曰此條言伏氣之病由內而出非若時行卒病由外而至也

太陽病發熱而渴不惡寒者為溫病發汗已身灼熱者名風溫風溫為病脈陰陽俱浮自汗出身重多眠睡鼻息必鼾語言難出若被下者小便不利直視失溲若被火者微發黃色劇則如驚癇時瘖瘖若火熏之一逆尚

引日再逆促命期

註

發熱不渴惡寒者太陽證也發熱而渴不惡寒者陽明證也今太陽病始得之不俟寒邪變熱轉屬陽明而即熱渴不惡寒者知非太陽傷寒乃太陽溫病也由於膏粱之人冬不藏精辛苦之人冬傷於寒內陰已虧外陽被鬱周身經絡早成溫化所以至春一遇外邪即從內應感寒邪者則無汗名曰溫病當以河間法用水解散審其表裏以解之

水解散即天水六一散防風通聖之合劑也感風邪者則有汗名曰風溫當以水解散減麻黃加桂枝倍石膏令微似汗以和之若大發其汗則益助蘊熱必令身熱如火灼也蓋風溫為病乃風邪外盛於表故陰陽六脈俱浮熱邪內壅於胸故多眠睡鼻息鼾也風邪傷衛表氣不固故自汗出壯熱傷氣故身重倦聲微語難出也若被下者則愈奪陰液故水泉竭而小便不利也太陽府氣將絕故

目直視也少陰藏氣不固故遺失洩也若被火者則以火益火而陽氣熏灼將欲發黃故微發黃也劇者熱極生風故如驚癇時瘈瘲也微黃病深色漸加黑故若火熏之也溫病熱病不惡寒者表熱也口渴引飲者裏熱也表熱無寒故不宜汗裏熱無實故不宜下表裏俱熱尤不宜火曰一逆者若汗若下若火也再逆者汗而復下下而復火也一逆已令陰竭尚可延引時日再逆則陰立亡故曰

促命期也傷寒者傷冬月之正寒也溫病熱病者傷三時之暴寒也非時暴寒乃異氣也以其兼令氣而為病也故春兼風溫即以風溫名之夏兼暑熱即以暑熱名之世人通名曰傷寒又名曰時氣醫工見其傳變六經表裏情狀皆同故同乎一治也其溫病熱病無汗者宜大青龍湯時無汗時有汗者宜桂枝二越婢一湯有汗者宜桂枝合白虎湯內熱者防風通聖散表實者倍麻黃裏實者倍

大黃量其病之輕重藥之多少而解之二日之前
未有不愈者其有外感邪重內早傷陰已經汗下
而不愈者則當審其表裏隨其傳變所見之證治
之可也此法惟西北二方四時皆可行之無不隨
手取效若江淮間地偏煖處冬月初春乃可用之
若春末秋前即脈證允合當用麻桂青龍等湯者
亦必輕而減之隨證消息適可卽止慎不可過過
則反致變逆經所謂同病異治者此之謂也

集註

程知曰溫病熱自內出故發熱而渴不惡寒風溫
內外交熱加之自汗故有身重多眠諸證有輕重
死生之分醫者當以有汗無汗為辨別之大要亦
即以可汗不可汗為救治之微權又曰仲景之青
龍白虎神矣得此意而推廣之可以應用於不窮
蓋溫病宜於發散中重加清涼風溫不可於清涼
中重加發散也

程應旂曰太陽初得之一日即發熱而渴不惡寒

者因邪氣早已內蓄其外感於太陽特其發端耳
其內蓄之熱固非一朝一夕矣蓋自冬不藏精而
傷於寒時腎陰已虧一交春陽發動卽病未發而
周身經絡已莫非陽盛陰虛之氣所布濩所云至
春發為溫病者蓋自其胚胎受之也

音切

軒

音早

癩

音聞

瘕

音熾

癥

音蹤

御纂醫宗金鑑卷十二

欽定四庫全書

御纂醫宗金鑑卷十三

訂正仲景全書傷寒論註痙濕暍病篇目錄

桂枝加葛根湯

桂枝附子去桂枝加白朮湯

甘草附子湯

御纂醫宗金鑑卷十三目錄

欽定四庫全書

御纂醫宗金鑑卷十三

訂正仲景全書傷寒論註

辨痙濕暍病衄證并治篇

經云諸痙項強皆屬於濕又云諸暴強直皆屬於
風論曰太陽病發汗太多因成痙夫六氣皆足以
致痙不專在濕也六經皆有痙證亦不專在太陽
一經也蓋身以後屬太陽凡頭項強急項背几几

脊強反張腰似折髀不可以曲脰如結皆太陽瘕也身以前屬陽明頭面動搖口噤齒齟缺盆紐痛脚攣急皆陽明瘕也身之側屬少陽口眼喎邪手足牽引兩脇拘急半身不遂皆少陽瘕也至若腹內拘急因吐利後而四肢攣急者未嘗非太陰瘕也惡寒踈臥尻以代踵脊以代頭俯而不能仰者未嘗非少陰瘕也羸丸上升宗筋下注少腹裏急陰中拘攣膝脛拘急者未嘗非厥陰瘕也大抵瘕

以狀名而瘓因筋急故凡六經筋病皆得以瘓稱之其因於風寒者必發熱惡寒而無汗其脈浮緊其狀身強直而口噤即經所云諸病強直皆屬於風者也其勢勁急故名曰剛瘓其因於風濕者發熱汗出不惡寒其脈浮緩其狀項強八八而身不強直即經所云諸瘓項強皆屬於濕者也其勢濡弱故名曰柔瘓若夫因誤汗亡陽津竭無以養筋而致瘓者即本論所云太陽病發汗太多而成瘓

又非因濕因風而却因燥者也蓋瘧之始本非正
病多雜於他病之中如婦人之脫血跌撲之破傷
俱能致瘧今見患此者悉指為風殊非確論學者
當於證中審察風寒濕燥內外虛實之因分別施
治庶不致悞慎勿槩指為風也

傷寒所致太陽病瘧濕暍此三種宜應別論以為與傷
寒相似故此見之

按傷寒所致四字甚無所謂衍文也

註傷寒太陽經中之一病非謂太陽經惟病傷寒也
蓋以六氣外感之邪人中傷之者未有不由太陽
之表而入者也痙風邪也濕濕邪也暍暑邪也夫
風寒暑濕之病固皆統屬太陽然痙濕暍三種雖
與傷寒形證相似但其為病傳變不同故曰宜應
別論也

集註方有執曰痙濕暍三者皆風寒之變證既成變證
則當別為立論然自風寒變來本屬太陽猶有風

寒涉似之疑須當併為辨論

病身熱足寒頸項強急惡寒時頭熱面赤目赤獨頭面搖卒口噤背反張者瘕病也

註

病人身熱惡寒太陽證也頸項強急面赤目赤陽明證也頭熱陽鬱於上也足寒陰凝於下也太陽之脈循背上頭陽明之筋上挾於口風寒客於二經則有頭搖口噤反張拘強之證故名瘕病也

集註

方有執曰此以瘕之具證言身熱頭熱面赤目赤

赤陽邪發於陽也足寒陰邪逆於陰也獨頭面搖
風行陽而動於上也卒忽然也噤寒而口閉也言
忽然唇口脰合噤急而飲食不通也背反張者太
陽之衄挾背寒則筋急而拘攣熱則筋緩而縱弛
也然剛柔二瘕則各見證之一偏惟風寒俱有而
致證者則具見也

鄭重光曰此總論瘕之經俞皆病氣血併傷而為
強急反張之證也風濕俱有故為瘕之具證也

太陽病發熱，脈沉而細者，名曰瘧。

註：太陽病發熱，脈當浮大，脈若沉細，兼少陰也。今發熱，脈沉細而名曰瘧者，何也？以其已病瘧證而得沉細，脈不可名太陽少陰傷寒之脈，當名太陽風濕瘧病之脈也。因風邪鬱於陽，故病發熱也。濕邪凝於陰，故脈沉細也。此承上條瘧病得沉細脈之義，非謂太陽病發熱，脈沉細即名之曰瘧病也。

集註

方有執曰：發熱，太陽未除也；沉寒也；細濕也。

程知曰脈沉細法宜救裏而瘕又為燥熱之病故金匱謂難治謂未可輕同於太陽發熱脈反沉之例也

張璐曰發熱脈當浮數而反沉細知邪風為濕氣所著所以身雖發熱而脈不能浮數是陽證見陰脈故金匱指為難治也

程應旂曰瘕病有同有獨固以其獨者名之矣然脈在太陽更有獨而無同以頭面搖口噤背反張

之證合沉細之脈雖有太陽發熱等證不致為傷寒所溷乃可定其名曰瘧也

太陽病發熱無汗反惡寒者名曰剛瘧太陽病發熱汗出而不惡寒名曰柔瘧

按反惡寒之反字衍文也剛瘧證應惡寒非反也

註

瘧病既屬太陽當以太陽虛實例之故曰太陽病發熱無汗惡寒為實邪名曰剛瘧發熱汗出不惡寒為虛邪名曰柔瘧此詳申上二條瘧病虛實非

謂太陽病發熱無汗惡寒汗出不惡寒即名之曰
剛柔痙病之證也

集註

程知曰太陽病發熱無汗惡寒為傷寒發熱汗出
惡風為傷風發熱汗出不惡寒為溫熱以證有頸
項強急甚則反張故不謂之風寒溫熱病而謂之
痙也

張璐曰金匱云太陽病無汗而小便反少氣上衝
胸口噤不能言欲作剛痙葛根湯主之即是申明

此條之義而補其治法也無汗而小便少者以太陽陽明二經之熱聚於胸中延傷肺金清肅之氣內外不能宣通故也又云太陽病其證備身體強八八然脈反沉遲此為瘧枯萋桂枝湯主之即是申明此條之義而補其治法也其證備則發熱汗出等證金匱已詳不必贅矣

太陽病項背強八八無汗惡風葛根湯主之

註此畧其證脈單舉瘧之頸項強急者以明其治也

太陽鯀下項循肩挾脊陽明鯀循喉嚨入缺盆貫
膈下乳內廉太陽主後前合陽明陽明主前後合
太陽今邪壅於二經之中故有八八拘強之貌也
太陽之強不過頸項強此瘞之強則不能俯仰項
連胸背而俱強故曰項背強八八也無汗惡風實
邪也宜葛根湯發之即桂枝湯加麻黃葛根兩解
太陽陽明之邪也

集註
方有執曰八八鳥之短羽者動則引頸八八然形

容病人之頸項俱病者俛仰不能自如之貌

太陽病項背強几几反汗出惡風者桂枝加葛根湯主之

註

太陽病項背強几几無汗惡風者實邪也今反汗出惡風者虛邪也宜桂枝加葛根湯解太陽之風發陽明之汗也

集註

汪琥曰太陽病項背強矣復几几然頸不得舒頸之經屬陽明項背與頸几几然其狀當無汗今反

汗出惡風仲景法太陽病汗出惡風者桂枝湯主之今因其几几然故加葛根於桂枝湯中以兼祛陽明經之風也

桂枝加葛根湯方

於桂枝湯內加葛根三兩餘依桂枝湯法

太陽病發汗太多因致瘕

註已上論瘕皆外感風寒濕而為病也若太陽病發

汗太多津液大亡表氣不固邪風乘虛而入因成

痙者乃內虛之所致也不可以柔痙剛痙例之宜以桂枝加附子湯以固表祛風為主治由此推之凡病出汗過多新產亡血過多而變生此證者皆類此也

集註程應旄曰即此一端推之則知此病得之亡津亡

血而因虛致寒因虛致燥者不少蓋陽氣者柔則養筋發汗太多則亡其陽而損其經脈之血液故也

濕家之為病一身盡疼發熱身色如似熏黃

註濕家謂病濕之人濕之為病或因外受濕氣則一身盡痛或因内生濕病則發熱身黃若內外同病則一身盡痛發熱身色如熏黃也熏黃者濕盛之發黃屬脾之疼濕故其色暗如煙熏也不似傷寒熱盛之發黃屬陽明之鬱熱故其色明如橘子色也

集註張璐曰濕證發黃須分陰陽表裏陽濕在裏茵陳

蒿湯在表麻黃連軹赤小豆湯陰濕在裏白朮附
子湯在表麻黃白朮湯此陰濕在表而發黃也金
匱有云濕家身煩痛可與麻黃加朮湯蓋寒與濕
合不宜大汗故加白朮以麻黃得朮則汗不致於
驟發白朮得麻黃則濕滯得以宣通也

濕家病身上疼痛發熱面黃而喘頭痛鼻塞而煩其脈
大自能飲食腹中和無病病在頭中寒濕故鼻塞內藥
鼻中則愈

註

此申上條詳其證出其脈以別其治也濕家病身上疼痛發熱面黃而喘此内生外受之濕病也外宜羌活勝濕湯內宜茵陳五苓散喘甚天陷胸丸若更頭痛鼻塞而煩其脈大證類傷寒但其人裏和能食知非傷寒不可發汗乃濕邪之病在頭故頭痛鼻塞惟宜納藥鼻中取黃水從涕出自可愈也所納之藥卽瓜蒂散類也

集註

鄭重光曰身上疼痛發熱面黃而喘頭痛鼻塞則

寒濕之邪客於上焦經曰因於濕首如裹是也用
瓜蒂散吹鼻此在上者因而越之之法也

太陽病關節疼痛而煩脈沉而細者此名濕痺濕痺之
候其人小便不利大便反快但當利其小便

註

濕家脈浮細濕在外也當汗之今太陽病關節疼
痛而煩小便不利大便反快脈不浮細而沉細是
濕邪內盛而為濕痺不通之候也故但當利其小
便使濕從小便而去乃濕淫於內之正治也

集註

成無已曰濕盛則濡泄小便不利大便反快者濕氣內流也但當利其小便以宣泄腹中濕氣古云治濕不利小便非其治也

方有執曰此以濕之入裏者言也關節疼痛者寒濕之氣走注內滲所以脈沉而細也痺以疼痛言小便不利大便反快者濕即水水不外滲則橫流不遵故道利其小便者導其遵故道而行也

張志聰曰關節者腰背肘膝之大關大筋之所統

屬不同於骨節也濕流關節大筋不和故疼痛痺閉也濕傷太陽筋脈澁滯故名濕痺利其小便則水道行而決瀆無愆濕邪去而筋脈調和矣

濕家其人但頭汗出背強欲得被覆向火若下之早則噦胸滿小便不利舌上如胎者以丹田有熱胸中有寒渴欲得水而不能飲口燥煩也

註濕家但頭汗出乃濕氣上淫之汗非陽明之熱不得越也濕家背強乃濕氣澁滯之重強非痙病之

拘強也欲得覆被向火非外惡寒乃濕盛生內寒也若誤以濕淫之頭汗為陽明瘵熱之頭汗而下之寒濕之氣乘虛入胸則胸滿入胃則噦矣寒濕不化故小便不利胸中有寒故舌上滑白如胎丹田有熱故口燥渴欲得水而不能飲由胸中有寒濕故也

集註成無已曰傷寒則無汗濕家雖有汗而不能周身故但頭汗出也

程應旄曰雖渴欲得水似熱而不能飲可辨則祇是口燥煩而實非胸中燥煩可知證同病別也

濕家下之額上汗出微喘小便利者死若下利不止者亦死

註

此承上條濕家誤下之逆也濕家誤下胸滿而噦小便不利舌上如胎口燥渴不能飲已屬逆矣尚在可治此誤下後額汗不已微喘不止是陽脫於上也小便反利下利不止是陰脫於下也陰陽相

離故死也

集註

方有執曰治濕當利其小便而以小便利主死何也誤治而陰陽散亡也

程知曰濕之中人陰先受之故本經濕證多從助陽溫散為治若妄下則陽虛陰盛而不可救矣額上汗出微喘虛陽欲上脫也二便不禁盛陰欲下脫也陰陽離決死矣

病者一身盡疼發熱日晡所劇者此名風濕此病傷於

汗出當風或久傷取冷所致也

註病者謂一身盡痛之病人也濕家一身盡痛風濕亦一身盡痛然濕家之痛則重著不能轉側風濕之痛則輕掣不可屈伸此痛之有別者也至於發熱濕家之熱早暮不分微甚風濕之熱則日晡必劇此得之於汗出當風或久傷濕復受風冷所致也

集張志聰曰汗出當風則為風濕久傷取冷則為寒

濕

張錫駒曰發熱日晡所劇者日晡而陽氣衰陰氣盛濕為陰邪故主旺時而甚也

問曰風濕相搏一身盡疼痛法當汗出而解值天陰雨不止醫云此可發汗汗之病不愈者何也答曰發其汗汗大出者但風氣去濕氣在是故不愈也若治風濕者發其汗但微微似欲汗出者風濕俱去也

註
此詳風濕相搏一身盡痛不惟不可下即發汗亦

不可失其宜也風陽邪濕陰邪風濕相搏陰陽受邪故一身盡痛也法當汗出而解值天陰雨不止則濕氣盛雖發其汗汗大出而病不愈者但以風氣去濕氣在是故不愈也以其值濕盛之時發其汗大汗出此汗之不如法所以不解也若治風濕者必俟天氣晴明發其汗但令其汗微微似欲出狀則風與濕俱去而病自解矣

集方有執曰陰雨不止則濕不除所以益當發汗也

然風濕本由汗出當風而得則汗之大出者必反
濕轉加甚微微似欲汗出而不見出則濕消而風
散矣此發汗之微機後之人動輒以大汗為言者
去道遠矣

張璐曰風濕相搏法當汗出而解合用桂枝加朮
使微微蒸發表裏氣和風濕皆去正如濕家身煩
痛可與麻黃湯加朮同義

程應旄曰濕家不惟不可誤下即汗亦不可誤汗

風濕相搏一證一身盡疼痛雖是微挾表邪然其
脈不浮終是汗難大汗治風兼治濕但使微微似
欲汗出者是其法也

傷寒八九日風濕相搏身體疼煩不能自轉側不嘔不
渴脈浮虛而濇者桂枝附子湯主之若其人大便鞭小
便自利者去桂枝加白朮湯主之

註此承上條詳申脈證以明其治也傷寒八九日不
嘔不渴是無傷寒裏病之證也脈浮虛濇是無傷

寒表病之脈也。脈浮虛，主在表；虛風也。澹者，主在經。寒濕也。身體疼煩，屬風也。不能轉側，屬濕也。乃風濕相搏之證，非傷寒也。與桂枝附子湯溫散其風。濕使從表而解也。若脈浮實者，則又當以麻黃加朮湯大發其風濕也。如其人有是證，雖大便鞭，小便自利而不議下者，以其非邪熱入裏之鞭，乃風燥濕去之鞭。故仍以桂枝附子湯去桂枝，以大便鞭，小便自利，不欲其發汗，再奪津液也。加白朮。

以身重著濕在肉分用以佐附子逐濕氣於肌也
集註成無已曰煩者風也身疼不能自轉側者濕也經

曰風則浮虛脈經曰脈來濇者為病寒濕也

桂枝附子去桂枝加白朮湯方

附子

三枚炮
去皮破

白朮

四兩

生薑

三兩
切

大棗

十二
枚擘

甘草

二兩
炙

右五味以水六升煮取二升去滓分溫三服初一

服其人身如痺半日許復服之三服都盡其人如
冒狀勿怪此以附子末併走皮內逐水氣未得除
故使之耳法當加桂四兩此本一方二法以大便
鞭小便自利去桂也以大便不鞭小便不利當加
桂附子三枚恐多也虛弱家及產婦宜減服之

風濕相搏骨節疼煩掣痛不得屈伸近之則痛劇汗出
短氣小便不利惡風不欲去衣或身微腫者甘草附子
湯主之

註風濕相搏骨節疼煩重著不能轉側濕勝風也掣
痛不可屈伸風勝濕也今掣痛不可屈伸近之則
痛劇汗出短氣惡風不欲去衣皆風邪壅盛傷肌
表也小便不利濕內蓄也身微腫者濕外薄也以
甘草附子湯微汗之祛風為主除濕次之也已上
二條皆詳風濕之義以明風濕之治也

集註

方有執曰搏挽聚也言風與濕挽合搏聚共為一
家之病也煩風也痛濕也風淫則掣濕淫則痛風

濕之邪注經絡流關節滲骨髓身體所以煩痛掣
痛而不利也近之則痛劇者外邪客於內逆之則
逆也短氣者汗多亡陽而氣傷也惡風不欲去衣
者以重傷故惡甚也甘草益氣和中附子溫經散
濕朮能勝濕燥脾桂枝祛風固衛此四物者所以
為風濕相搏之的藥也

吳人駒曰必脈之沉而細者若浮大而盛則風多
而濕少附子須在審之

甘草附子湯方

甘草

二兩
炙

附子

二枚
炮去
皮破

桂枝

四兩

白朮

二兩

右四味以水六升煮取三升去滓溫服一升日三服初服得微汗則解能食汗止復煩者服五合恐一升多者宜服六七合為妙

方解風濕之治用甘草附子湯即桂枝附子湯去薑棗

加白朮也去薑棗者畏助汗也加白朮者燥中濕

也日三服初服一升不得汗解則仍服一升若微
得汗則解解則能食是解已徹也可止再服若汗
出而復煩者是解未徹也仍當服之但不可更服
一升恐已經汗多服而過汗也服五合可也如不
解再服六七合為妙似此服法總是示人不可盡
劑之意學者於理有未解處即於本文中求之自
得矣

太陽中熱者暍是也其人汗出惡寒身熱而渴也

註

中暑熱病亦由太陽表入故曰太陽中熱者暈是也其人汗出惡寒身熱而渴頗似太陽溫熱之病但溫熱無惡寒以熱從內發故雖汗出而不惡寒中暈惡寒者以暑由外入故汗出而惡寒也究之於脈溫熱之浮必浮而實中暈之浮必浮而虛以暑熱傷氣也究之於渴溫熱之渴初病不過欲飲水中暈之渴一病即大渴引飲也溫熱則傳經變病不一中暈則不傳不愈即死也雖同為太陽經

中之病而虛實施治不同宜以人參白虎湯主治之

集註方有執曰蒸熱謂之暑傷暑謂之暍汗出惡寒者

太陽表不固也身熱者暑邪傷陽也渴者亡津液而內燥也

程知曰此辨暑熱脈證也太陽中熱者謂是太陽表證而屬中熱也均是太陽表病汗出惡寒身熱而不渴者為中風汗出身熱而渴不惡寒者為溫

病今汗出惡寒身熱而渴則是中暍暍者暑熱之氣也不言暍而言熱以其胃熱為獨重也裏有熱故身熱而渴暑傷氣故汗出惡寒

吳人駒曰不可因惡寒而用辛溫又不可因汗出而固表惟宜甘寒以解其暑熱可也

太陽中暍者發熱惡寒身重而疼痛其脈弦細朮遲小便已灑灑然毛聳手足逆冷小有勞身即熱口開前板齒燥若發汗則惡寒甚加溫鍼則發熱甚數下之則淋

甚

註

此申上條詳出證脈戒人不可妄行汗下溫鍼也
太陽中暍無汗身重疼痛者似傷寒也但脈弦細
訖遲非傷寒脈也且有小便已而灑灑然惡寒毛
聳之證乃太陽膀胱表氣為暑所傷而然也手足
逆冷者乃暑傷氣氣傷不能達四肢則寒也小有
勞身即發熱口開前板齒燥者乃勞則動熱暑熱
益烈傷陰液也此皆中暍危證若以發熱無汗惡

寒身痛誤為傷寒之表妄行發汗則表氣愈虛惡寒更甚也若以手足逆冷誤為陽虛妄加溫鍼則暑邪愈盛發熱更熾也若以壯熱齒乾誤為胃火而數下之則水源竭澀尿淋窘甚也凡此之證皆中暍妄行汗下溫鍼致變惟宜以白虎加人參湯主之或人參湯調辰砂六一散亦可也

集註成無已曰經云因於暑汗煩則喘喝口開謂喘喝

也喘喝不止故前板齒燥

程知曰人身之陽以汗而外泄人身之陰以熱而
內竭故喝證禁用汗下溫鍼謂汗則傷陽下則傷
陰溫鍼則引火內入也

張錫駒曰灑灑者惡寒之象也毛聳者毫毛豎起
也

太陽中暍者身熱疼重而脈微弱此亦夏月傷冷水水
行皮中所致也

註
太陽中暍之證身熱疼重者暑傷形也脈微弱者

暑傷氣也以此證脈揆之亦其人夏月盛暑喜貪
風涼過飲冷水水氣輸行於皮中表為邪束不得
汗泄所致也此時即以香薷飲大順散汗之可立
愈也若因循不治則水氣既不得外泄於表而作
腫勢必內攻於裏而喘脹矣是又當以葶藶大棗
湯或瓜蒂一物散下之也上條戒人不可汗下此
條示人宜當汗下仲景之法多是如此蓋恐人固
執失宜也

集註

方有執曰身熱疼重而曰夏月傷冷水水行皮中
所致者土主肌肉而惡濕水滲土而蒸發也脈微
弱者熱則血乾而氣耗也然夏月飲水人之常事
而曰傷何哉良由暑迫飲之過多或得之冷水澡
洗暑反內入也

張璐曰按論喝三條首言動而得之之病謂中喝
屬外因次言靜而得之之病雖曰中喝實暑病也
屬內因末言因熱傷冷之病乃中喝之變證屬不

內外因不得以三者混稱也

程應旂曰可見中暍之病大都陽氣在表而胃中
虛冷所以身熱疼重而脈微弱夏月飲冷水裏陰
鬱住表陽水氣不得宣洩而行於皮中多有此證
此則開鬱宣陽又為暍證中增一義也

音切

八

音殊

搏

音團

掣

音徹

暍

音謁

灑

所下切

御纂醫宗金鑑卷十三